

Typs QUILLAV. Universitatis & Facultatis Medicinæ Typographi.

DECRETUM

SALUBERRIMÆ FACULTATIS PARISIENSIS.

DIE Lunæ 8^o Aprilis anni 1737, convocatæ ad hoc Facultati saluberrimæ, ut super Thesi die Jovis 4^o ejusdem mensis propugnatâ deliberaret, dixit Decanus; Dolere se quod in istis, quæ tunc primum extra ordinem convocasset, Comitibus, de inquirendo in Collegæ eruditionem atque doctrinam ageretur. Se tamen nec Facultatis dignitati & honori, nec, illud efflagitantibus, Clarissimo Viro D. RENEAUME, Academiæ Censori, pluribusque aliis meritissimis Collegis, potuisse non concedere, ut in Thesim cujus quæstio est, *An amica Musis Hydroposia*, die Jovis 4^o Aprilis propugnatam, & à Præside M. Henrico BESNIER exaratam, saluberrima Facultas animadverteret. Sibi quidem, Decano, hanc Thesim parum elegantè scriptam, passim obscuram, & quibusdam in locis, vix ac ne vix explicabilem visam fuisse; supradictis verò Doctoribus, aliâ etiam de causâ, ad Facultatem, eandem Thesim deferri placuisse, quod nimirum sequentem propositionem, quæ in pessimum sensum posset fortè detorqueri,

containeret; Unde sequitur, ingenium, utpote quid è triplici substantiâ conflatum, & posthâc cum illâ communicans, indè, id est, alimentis, reparari: Quasi illud intelligi voluisset, incogitans, ut suspicari licet, denuntiatae Theseos Author, Mentem humanam esse quid *divisibile*, partibus constans, *materiale* & *materialis* reparationis capax aut indigum. A quâ sanè sententiâ Christianus quilibet planè abhorret.

Addidit præterea Decanus, ipso die quo Thesis illa propugnabatur, exemplaria, Medicinæ studiosis, cæterisque astantibus distribuenda, retrahendo ad se atque retinendo, cavisse, quantum fieri poterat, Facultatem, ne in vulgus tale scriptum serperet. Sed Medicis Parisiensibus Catholicam, Apostolicam, Romanamque Religionem profiteri se, atque obsequare gloriantibus, non satis esse si violatae tantillum, aut imprudenter tantum læsæ Religionis rei non habeantur, decere insuper, necessumque esse eos vel levissimâ suspensionis umbrâ vacare. Quid igitur in tali rerum statu agendum esset, saluberrimus Ordo deliberaret.

Quibus auditis atque perpensis, rogatisque præsentium & frequentium in iis Comitibus Doctorum hac de re suffragiis, censuit Facultas saluberrima, Thesim cujus quæstio est, *An amica Musis Hydroposia*, Doctore Medico Parisiensi, æque ac saluberrimo Ordine indignam esse, eamque improbandam, & suppressendam, unanimi voce pronuntiavit atque decrevit. Et sic conclusit LUD. CLAUD. BOURDELIN, Decanus.

Cui Decreto, die Jovis nono Maii, à Decano, in Comitiiis, coram Facultate lecto, Magister Henricus BESNIER, Theseos author & Præses, adhærere se testatus est, hancque propositionem, *unde sequitur, ingenium, utpotè quid è triplici substantiâ conflatum, & posthâc cum illâ communicans, inde reparari*, eo sensu quo mentem humanam esse quid *divisibile*, partibus constans, *materiale, & materialis* reparationis capax aut indigum significaret, se ex animo & bonâ fide ejurare declaravit. Hâc auditâ Magistri Henrici BESNIER ejuratione, collectisque super eâ præsentium omnium Doctorum suffragiis, censuit saluberrima Facultas, Decretum die Lunæ, 8^o Aprilis, latum, typis mandandum esse, publicique juris faciendum. Et sic conclusit LUDOVICUS-CLAUDIUS BOURDELIN, Decanus. Datum Parisiis die Veneris decimo ejusdem mensis & anni.

BACCALAUREI EJURATIO.

Ego infra scriptus saluberrimæ Facultatis Medicæ Parisiensis Baccalaureus, declaro me ejurare eam propositionem, *Unde sequitur, ingenium, utpotè quid è triplici substantiâ conflatum, & posthâc cum illâ communicans, inde reparari*, eo sensu quo Mentem humanam esse quid *Divisibile*, partibus constans, *Materiale, & Materialis* reparationis capax aut indigum, significaret, meque judicio à saluberrimâ Facultate, die Lunæ 8^o Aprilis anni 1737, lato adhærere. Parisiis 9^o Maii 1737. CAROLUS DIONIS, Baccalaureus Medicus Parisiensis.